



Regd.No.19134/88 <http://www.kbc.org.in> NAI/220/99
No-G-4/Regd.Magazine/KBCThuso/MNP-81

KBC | THUSO

Kum 54 Ihinna

Ellha/October 2017

So462



KBC Worker's Retreat 2017 Elijah Prayer Mount, Gothol

Khangthah te Mopohna

Nov. Events

CHAPANGTE NIKHO -05
SUNDAY SCHOOL DAY - 12

"Kapa theng, eini pumkhat ihi bang a amaho jong
pumkhat ahitheina ding un, Nangman amahohi hong in"

John. 17:11



9th ASIA PACIFIC BAPTIST CONGRESS 2017
Yogyakarta Indonesia a KBC Lamkai gapang ho



Head office
 opp. DM College
 Imphal



www.kbc.org.in



kbcindia@rediffmail.com
mail@kbc.org.in



MBC Secretaries Conference 2017, CBCNEI Mission Compound
Guwahati munna anakibol.



Convention Men Department in
Oneday Get Together
KBC Office Chapel Hall munah ana kineikhom in lolhing tah in akichitai.

CONTENTS

T H U M A K A I H O

1. Editorial/Khangthahte Mopohna	1
2. John the Baptist /Rev. Lamkeng Lhouvum	5
3. Sunday ni Houin kai a che/Rev. Henjalen Dounghel	9
4. Mission Column	13
5. Women Column	17
6. Youth Column	19
7. Literature Column	21
9. Report/Hetsah	25-31

EDITORIAL BOARD

<i>Chairman</i>	: Rev. Dr. Hawlngam Haokip, President KBC
<i>Editor</i>	: Rev. Ngamjapao Haokip, General Secretary
<i>Joint Editor</i>	: Rev. Henjalen Dounghel
<i>Contributing Editors</i>	: 1. Rev. Letpu Kipgen 2. Rev. Onthang Haokip 3. Rev. Kaikhokam Chongloi 4. Pastor Paokhohao Haokip 5. Pastor Satminlen Khongsai
<i>Cir. Manager</i>	: Ms. Lhingjanem Haokip
<i>Design & Layout</i>	: Hemkholen Haokip

T H U S O L A H M A N

Church/Organisation/ DepartmentRs. 300/-
IndividualRs. 200/- (Post a Rs. 250/-)

Indian Overseas Bank, Imphal Branch

A/c No. 073201000000350 IFSC No. IOBA0000732

The General Secretary,
Kuki Baptist Convention,
Opp. DM College, Imphal 795001, Manipur
email: kbcindia@rediffmail.com

Advertisement bolnom hon Mobile No. 9612817768 Contact thei.
Circulation to kisai lam Mobile No. 9862633173 bol ding.



KHANGTHAH TE MOPOHNA

Editorial

Thumakai:

Houbung mite jouse Jesu Christa minin ngailut na salam kahin pei. Tu lha October (Ellha) thupi hi "KHANGTHAH TE MOPOH NA" ahi to lhonin Pathen lekha bu thengin Khangdong ten ichan'a mopoh na anei ham veo hite. Khangdon lai kiti hi mijousen alha ngaiyin chule khangdon hinkho man sunga hi khonunga itobang ihung hi ding chu kiheji ahi tai. Tunin khangdong tampin hinkho mantam dan le aloupi dan ahe them'a akilhom tan hinkho hi adam jing dingle ahing jing ding dan'a kigela jong mi aki tam tan ahi. Pathen lekhabu Thengin hitin aseiyin ahi "Nikhopha lou ho ahung lhun masang nangin jong hichenga hin lunglhaina kanei poi tia naseina ding kum le lha ahung nai masang, nakhang don laijin nasem pa geldoh jingin" (Eccl. 12:1). Hichea kon'a mudoh thei chu khangdon hinkho jong hi adam jing dingle apha jing ding ahi poi ti mudoh thei ahi. Khangdon hinkho sunga mopoh nale het jing dinga dei um chu ahile:

1. Khangdon hinkho man sunga hin
vetjuithei hinkho man angaiye (1 Timothy
4:12)

Paul missionary akhol jin nan khangdong
tampi toh ana kivop in Timothy jong hi
Paul nungjui lah a khat ahi. Timothy hi
khangdong Pathen gingtah a hinkho mang
mi ahin Paulin jong kinep pi tah le kisonpi
tah a anei chule ama tohding le thamding
ho jong nganse na ana pehji ahi. Jesu
Christa dia lhacha lolhing ahithei nadingin
thupeh le thuhil jong tampi ana pen ahi.
Athuhil holah a khat chu ipi ham itile “vetjui
thei hinkho” aman ding hi ahi. Lhacha na
tongding michun vetjui thei hinkho aman
ding apoimo l'eh e. Paulin Timothy chu
thulam, nunchan khanchan, ngailut na,
chule then'a lama atahsan ho vet sui dinga
hinkho aman dingin ana hil'e. Pathen thu
seiphong le na a hinkho manding jong hi
khangdong te mopoh nakhat ahi. Chihna
thepna het naho ijat kinei jong le Pathen
lhacha notong tedia nun chan le khanchan
kitup tah a hinkho manding hi khangdong
te mopoh nakhat jong ahi. Mi vetjui thei
louva hinkho man hi lolhin lel na khat ahi.
Ngailut na ajong hinkho aman dingin ana
hil'e. Ngailut kiti hi Christian hinkho adinga
athupipen ahi. Ngailut na nei michun kingai
damna hinkho jong amang theijin ahi.
Tunia kitha, kimat le kibol genthei naho hi
ipi jeh hin tem ?ngailutna aum lou jeh ahi.
Kingailutna aum louteng chamna aumthei
jipon, chamna aum louteng aki lamvaijin

akimah thah ji e . Thenna lam'a jong vetjui thei hinkho manding hi apoimo e. Pathen hi atheng ahin aboh kiti to umkhom thei lou hel ahi. Tahsa hi lhagao Theng chenna in ahin, thenlou- na hinkho mang michun asunga cheng lhagao chu asuhboh joh ahi (1 Cor. 10:16). Timothy hi Pakai lhacha natong ahi jeh in mopohna lentah jong anei in Pakai lhacha na atoh na a lolhinna anei thei nadinga chu amasa pen'a vetjui thei hinkho aman dinga Paul in ana hil ahi.

Houbung mi suh hal nadingle Pathen thuhil na pan lah angaiye (1 Timothy 4:13) Alhangpin khangdong hon thanom tah a houbunga pan alah teng houbung hi halna aumin kikhop khom najong anom chomin ahi. Timothy hi khangdong cha ahivangin Paulin kinep pi na lentah aneyin houbung sunga ahat mote le akipah thei loute kipasah nadinga nasatah a pan alah din ana hil'e. Pathen le- khabu Theng hoitah a sim'a hetchet na ahelou laite hetsah nadinga hin khangdong tenjong mopoh na lentah aneyin hi. Timothy chu chapang cha ahi vangin Pathen thu jong asim jingin, ahetchet jeh chun thudih in houbung mi te cu ana vah khang jingin ahi. Tulaiyin khangdong tampin Pathen thu sangin tahsa lam thu holna hinkho manga atam tan Pathen thu seithei loule ahe chen louva mi akitam val tai. Mi abang khat chun Pathen thu to kitoh lou thuhil lhem jong aseiphong gam tan houbung tamtah hi Pathen thu hechen loule muchen lou- va hinkho manga jong atam tai. Paul khanglai jenga jong chu thuhil lhem ana um peh ahi jeh chun thudih le thutah seiphonga dinpi jing


dia Paul in Timothy chu ana kivop pia ana hil jing ahi. Nangman tunia nakhangdon hinkho chu ipi lampia naman em? Nopsah na naman em ahil-oule ipi lampia hinkho naman em? Pathenin vang khangdong hinkho man sunga hi nabol theichan le natoh thei chan tong dinga nadei ahi. Nahin kho chu itobang hinkhoa naman em tua damna hinkho naman pet hin athah beh in nunggel kit tiem in! Pathen thua kimang cha jinga akhang hoilaise alenggam natoh na hinkho mang nahi le nakisih lou hel ding ahi. Amavang nangma dei lam panga hinkho mang nahi a Pathen thu to kigamla tah a hinkho manga chon nahile nakisih nading nikho le phat hunglung tei ding ahi. Hijeh chun tu nadam pet hin kigel lhah na neijin.

Thuchaina:

Nahinkho kum ijat nahin ding nasei thei poi. Khangdong hinkho jeng jong het man louva bei jeng thei ahi. Khangdong hinkho naman sung hin mopoh na lentah naneie; nahinkho chu miho vetjui theiya hinkho mang nahi hinam? Nun lekhan chondan; thenna, ngailutna, Pathen lekhabu simnale alhasam ahatlou te kithopi na a nahin kho le naphat naman chah jing hinam? Hitobanga hinkho mang michu Christa dia lhacha phatah ahin, Pathenin jong hitobang michu ana tong dia adei ahi. Kuki Baptist Convention sunga khangdong tejouse Pathenna dia man chah phatah ahung huiua, mopoh na lentah nei ahi geldoh jing pum'a hikho mang ahi thei nadiu vin Pathenin khangdong te jouse lolhinna eipe taohen. Amen!

John The Baptist le Pathen natoh

By. Rev Lamkeng Lhouvum
Pastor KBC No.7



SERMON

"Gamthip a khosam aw khat'in, Pakai lamlen semtohsan koiyun, a lampi semjangun, ati tia kisun bang chun John the Baptist chun gamthip'ah lung heiya chonset chul mangna dinga Baptist chan ding thu lhangsamin ahung pot in," Mark 1:3-4

Thumakai:

John the Baptist natoh lai hin, chuche phat lai chu hou thua kitahna um lou laitah, Thempu ho jong Pathen kin bol ding sanga lamkai hiding deijoh phat lai ahi. Greek ten jong chemjam'a galsat ahin boluva, phat chom khat jouva hiche sangin chihna (philosophy) joh aphachom joi tin ahin podoh un ahi. Hiti chun Chemjam sangin pen ahatjoi (Pen is might-er than sword) ti hichu thagum'a galsat sangin pen tuija le- kha kijih apha chomjoi ahin ti taovin ahi. Alang khatna Rome ten gam jouse lampi ahin sem lhung gam taovin ahi. Greek ten pilna lama ahung khang lenun, Rome te vaihom na lam'a

ahung khan len taovin ahi.

John the Baptist ahung khang let lai jin hou thulam'a setna ana len ma ma in hitobang phatna hi Pathen na ahitoh ahi. John natoh umdol achom lamin veo hite.

1. John hi apen umdol lam dang tah ahi.

Anu Elizabeth chu nao nei ding jong hitalou ahin, apa jong Thempu natong ahi. Hitia Pathen houva aumlai tah in, vantil khat ahenga ahung kilah in, chapa khat na nanei ding ahin, amin jong John nasah ding ahi ati. Ahin aman atah san lou jeh chun, apen kahsea pao thei lou ding nahitai ati peh in ahi. John ahung pen kahsen apa Zachariah chu pao thei louvin aumin ima cha sei thei louvin aumin ahi. Tunia jong tahsan lou jeh'a ima cha sei doh thei lou akitame.

John apen je alam dang ahi bang hin, Lhagaova ipen nikho jong lam dang hid-ing ahi. Mi kon khat chu ka peng thah e iti leh lung lhai jeng kium ahi. Naosen chu ahung pen leh akikipah cheh jin ahi. An ineh sah'a ahung khang letna ahung tou thei, alhai thei ya anu le apa ahet leh kipah cheh cheh ahi.

Ahin tulai eiho kon khat hi Lhagaova pengthah kahi tia khan touna imacha um lou, ningkum'a sanga tukum'a alhasam jep jep kitam ji ahi.

John chu ahung pen ding chu anu oisunga aum a patna "Lhagaa theng" dim ahitai. Ei ho vang chu inu oisunga lhagao theng toh dim sanga thil dang toh dimsa hung peng tha kitam leh kilom ahi. Minu naovop lai leh minu pen ngaitona, lung kham hat jing ahilouleh kipah jing ahileh hitobanga chu Naosen jong hung peng ji ahi. Leiset mi-hem ten jong Naovop lai leh ngol thei thei angol banga, Lhagao hinkho jong hoi tah'a vet kol angaijin hinkho theng tah'a man angaije.

Mi an hon minsa ineh leh itahsa dam na toh kitoh lou idam pi lou tampi aumjin ahi. Hibanga chu mi an vahsa a na um leh api lhing lou nahi ding ahi. Nao sen chu hiche an hi neleng phading hiche vang pha lou ding ti ho chu akhang tou ahi. John hinkho jong apen dan alam dang bang hin, lhagao hinkho ahoi na dinga an neh pha kilhen them ding ahi.

2. Anatoh je (Ministry)

lamdang ahi.

Isaiah Themgao pan aseï banga atoh ahi. Luke Gospel'a chu isim leh, Molsang ho chu sucham mun lang dam kom ho sudimun akitin ahi. Malachi 4:6 sunga chun "Elijah hin mipate lungthim jouse achateu lungthim banga aheidoh peh a, achateu lungthim jouse jong aheidoh peh ding ahi."

Hiche a kisei hi John the Baptist kiseina ahin, ama chu miho lung chang hei dinga hunga ahi. Ama hi Pakai lampi bol dinga hunga ahi. Molsang ho chu su cham ding leh dam kom ho sudim dinga hunga ahi. JCB in lampi anot cham banga Pakai lampi semtoh dinga hunga kisol ahi.

Milen khat khosunga ahung ding tengle amasanga kilhai masa a, pahvui opeh ding ho, chatui donsah ding ho, labung sading ho kom'a kigingsan umin hunga lhung pai ding ahitai, kiti banga chu John in jong Messiah hunga ding ahitai ati ahi. Nalung sungaa Pakai hunga lut thei lou na dinga molsang banga umte ho chu kiphajal sah un lang, damkom banga um ho jong chu sudimun ati ahi.

John leh Jesu chu insung ki-

naicha ahi. Pen dollin John atahjo ahin, hinlah aman keima "akengchot khao sut lham dia jong kilom kahipoi atin" ahi. Pakai anga, Pakai keima imacha kahipoi ti thei ho chu mi vangpha ahi. Pakai kalung thim sunga Zion lampi neisem peh in ti thei ho mi-vangpha ahi. Mi tam tah lung thim sunga Sadom le Egypt lampi lungput nei hi bai ma ma ahi. Egypt lampi a chu ipi um ham? Sohchana aumin, milim houna aumin, Numei pasal chon tha hoina aumin ahi. Ps 84:5 A lung sunguva Zion jotna lampi umte chu mivang pha ahi. John chu Pakai Zion lampi sem dinga hunga ahi.

3. Gamthip a Pakai aw gin kahi.

Hou lamkai hon nang hi koi nahim, Themgao nahim atiu chun, keima gamthip'a khosam aw kahi atin ahi. Mtt.11:11 sunga isim'a ahileh Pakai Jesun, Numei sunga peng lajh'a John sanga lenjo aumpoi atin ahi. Abraham sanga jong lenjo, Elijah Themgao sanga jong lenjo ahi tina ahi. Pakai Jesun numei sunga peng lajh'a John sanga lenjo aumpoi atin, hinlah aman, kei hi "Gamthip a khosam aw" kahi atin ahi.

Hiche a John the Baptist akineosah dan chu akimun ahi. John chun Jesu adomsang cheh cheh in, ama akineosah cheh cheh in ahi. Akengchot khao sut dia jong kilom kahipoi atin ahi. Hitobang kineosah na lung chang nei ho mi vang pha ahi.

4. A thusei jong lamdang ahi.

John athusei thupi pen chu "Na lung heijun Pathen gam anaitai" atin ahi. Lung hei kiti hi kile hei tina ahi. Greek paova kona kisei na a jong kipum hei atin ahi. Natuh khuh lam'a kon'a namai lam a kiheijin atina ahi. Gan hing ho kisi thei lou ahi. Bong noi nakoi chu Uicha ham, Mengcha ham in ana chip mai thei ahi, hin lah akisi thei pon ahi. Mihingin vang kile hei theina akineije.

5. Akivondan leh Aneh chom beh ahi.

Tunin von ja chom chom kivon atamin ahi. Hinlah hinkho hi mideisah banga kivon sanga Pakai dei banga man ding hi thupi jo ahi. Akonggah kisei hi mi nei khah lou aneije tina ahipoi, hinlah leiset mihem te chon banga chon talou tina ahi. Themgao ho kivon dan'a kivon hiding tahsan ahi. Them-pu ho von'a chun akong akigah jiuvin ahi. An-neh jong chom beh ahi. Gam khoiju leh khaokho anen ahi. Hiche hi Khaokho ho aman khomin ane-e tina ahipoi. Theiga leh khoiju tina ahitin Bible them hon ahilun ahi. Akisei nom pen chu John the Baptist A an-neh chom beh aneh ahi tina ahi. Sopite ho tunia Lhagao miten jong Lhagao an neh jong achom ahiding angaijin ahi.

Thuchaina:

Sepai galsat ding chu Bongnoi atuije kiti hen lang sepay ho chu kipe hen lang hileh gal ajou nadiuven? Gal ajona dinga chu An-phatah nehsah, an tahbeh aneh diu angaijin ahi. Ei ho jong niseh a Christa a dinga gal dou ding ihiuleh An tahbeh ineh diu angaijin ahi. Nitina na an neh leh na L:hagao hinkho dimun kihe chen ma ma ding ahi.

John the Batist banga Pathen in tulai khang mite jong ama natong ding in ei dei sah un ahi. Pathen in asim jouse phat thei boh jing taken.

Sunday nile Houinn kai a che tei ngaimong ham?

*Rev. Henjalen Doungel
Mission Secretary*



Sermon

Sunday ni jingkah ahung hileh nalung thim a ipi nagel ji em? Houinn kaiding kahi tia thanopna nanei jiem ahilou leh houinn kaikit ding tah chu ngap chat aum mo nah e che lou ding la anom thei pon nati jiem? Hoipen joh hi Sunday ni jingkah lungput na naneiji em?

Tulai hi Christian tamtah tohletham boipi ding tam jeh in houinn kaiman lou jena boi jong aumtan, chule jankhovah a duty bol jeha jing kah a kithou jou talou va houin kaijou lou jong tampi akium tai. Langkhatna hitabang a tohle tham boijeh hilouva mipi laha touva phat suhmang ding ngapchat lal jeha houin chelouva Houinna Pathen kihoukhomna programme ho ama in muna online a TV a vejong tampi aumtai.

Khantou machal jing to lhona houinn kaijong amun mong a gakai sanga inn a joh kai thei ahitia pan lajong atam tai.

Christian te din Sunday nikho hi nikho thupi pen ahijenge ahideh in Roman Catholic houbung ho dingin ajeh chu hiche ni a hi Pakai Antheng

jon nehtei ding ahi ti gelnat na anei jun ahi. Hitabang nikho nit hin mihem khat chu angaija houinn kai ngai ahi ti habit khat apeh keo hilou vin hiche hin Christian hinkho a phatchom na lentah apeh jong akimui. Hiejeh a chu Christian te hi Sunday niseh leh houinn kaija ache ngai mong ahi.

Sunday nikho kinita houin kaija kiche hi Christian te dia midang houdang toh kibah louna lenpen khat ahi. Hiche nikho hi atila semtil a Pathen in ahin phudoh anahi peh tai. Genesis lekha bu ivetleh Pathen chu Sabbath nikho hin akichol don ahi. Hiche hin avetsah chu semtila pat phat khat hi phatdang jouse laha Pathenin jong atumse a kichol donadia anaman ji ahi. Hiche Pathen nikho nit hi kila son a tuni Christian ten hapta nimasa ni a Jesu Christa thina gal jouva athodoh nikho nita hapta nikho masa ni hi nithengni/Pathen ni tia ihin nit jing peh u ahitai.

Moses dan thupheh Isreal te hinkhoa ahung kipeh son jing tolhonin hiche a kon hin kal khat akison ben hiche nikho hi natoh a kon kichol

do nin ahung kimang tan ahi. Hiche nikho a Pathen houna inn a che chu jews te dia thil thupi tah khat ahung hitan ahi. Hiche lai muna chu Rabbi khat in Pathen lekha butheng chu anasim doh ji ahi. Hilai a kona chu Rabbi pachun mipi te chu lekha buthenga kisun chu ahil ji ahi. New Testament lama gospel ho jengajong Jesu Christa in synagogue a Pathen thu agahil imu un ahi.

Mipi dinga boina:

Tu eiho khanghin houinn kaihi alha suh cheh cheh tan ahi. Kum 2016 chun Gallup poll abol naova chun United States gama 71% in Christian kahi tin kiphon na aneiun ahi. Ahinlah kidangtahn 36% sheh bou houinn kaina a pontho tah a pan la ahi amudoh un ahi. Tunia hi ipi jeha houinn kaina lama hichan a hi lhasuh suh jeng hitam? Hiche hi eiho kuki chate lahjenga jong dih din aume.

Mihem te kivaikomna chena lhongpi hi anitininkikhelna aumjing in ahi. Ahin Technology in mihem akikhel sah bang hin imadang in mihem hinkho akikhel sah poi. Hiche a kona kimu chu mihem kipumkhat a chenkhome

phatchom na sangin changhina phatchomna kimu hi mitamjon deisah na ahin nei jotan ahi. Khosung le vengsung a kivilto kichotto naphat ahung kinei lhomcheh chehin eimachang phatchom nadinga changchena changhin hi mitamjo deisah ahung hitai.

Technology hin mihem hinkho a phatchomna tampi ahin pei tihi kinelna bei ahi. Ahi-dehin houbung mi tamtah in houinna kimanchah naho telecast ainna veta kaikhomna a pang dana kigel najong aso sahtan ahi. Ipinga ba mihem khat chu choltah a jingkah matah a thouva houinn kaija chea kaikhomna sungsea touthimbeh jeng dingba ham? Technology khantouna dungjuia programme saotah chu aphalai ahoilai lai kila a ahoilou laijouse kilamang a kistem toh programme TV a veta lupna chungu nomtaha kicholdo to gomma houinnsunga kiman chah na a chan neithaina umnunga. Hopsom penge nati jong leh online a napeh thei ja Houinn sung lutlou hella jong houbung member khat nahi thei laija ipidinga ba genthei taha Pathen nahou dingham?

Ahin hitabang a lungput neiho le chena a neiho dingin achanjoulou u khat aume.

Paul in Romans, Ephesians, Colossians, Corinthians chule adang dang houbung mite lekha athot khu ven. Paul in lamchom chom a Pathen hounading deisah na anei imacha houbung mite koma aseki akimu poi.

Paul in Corinthian 12:26-27 a tibah khat adammo leh tibah dang jong athoh gimji, tibah khat choisang a aumleh tibah dang jong choisang in aumin nangho jouse Christa tibah nahiuve ati.

Hiche bible chang akona imu chu mihem khat houin akainom louteng amalung gelin imacha keidin akhoh na aumpoi tijong leh houin chu anung sun ahitan kipumkaht a lungkhat a Pathen houkhom na le vahchoi khomna a pan latalou ahui chun houbung mi pumpi atoh khah ahitai.

Mihem jouse hi Pathen a kon thil peh chom cheh kichang ahi. Hiche thil peh ichan uchu ama loupi na dinga mang cheh din Pathen in eidei ui. Houbung mite kiman nale

panlah na a pang nomlou houbung miho chun houbung chu alang thisah u ahi. Khantou na ahinading banga neithei louva houbung chu akoiu ahijoi.

Houin kai naa icross u ikiput u ahi.

Houin khat a kai kiti hi kipeh doh na lentah khat ahi. Mihem tamtah in asumle pai muhou Pathen henga ahin choilut uvin, houbung mipi tetoh vahchoi la asa khom un, taona amang khom un, agenthei nao le akipa nao aseikhom un, Pathen phatna ho aseikhom uvin thukhat pumkhat hina a pan ala khom un ahileh hiche houbung chu akhang tou thei jinkhat le khat kitilkhoh tona le pohgi kipoh huna achun tahsa lam hihen lhagao lam hijong leh kingailutnale khantou na lentah apethei jin ahi. Ajeh chu tahsan chate jouse Christa tibah khat cheh iheovin akikhen thei ium pouve.

Phat kiti hi mihem hinkho a dinga mantampen chu ahung hitai. Tulai mihem te hi akhantou nale akhantou lou na aphot mandan in akivetan ahi. Pamlam miho Christian hilou hodin pung nipung thum sung houin kaija Pathen a dinga phat kipe hi pamai umtah himai thei ahi, Ahin lah Pathen a hing ho ding chun nikhat pungal 24 sunga Pathen a dinga pung ni pung thum pehdoh hi lungnachim na le kipa bukim na joh ahi.

Hijeh a chu tunia eiho Pathen phatthei boh changte ipi dinga houinn kai gelkhoh lou va ium ding ham? Hapta khat sunga nisagi Pathen in eipeh u nigup sunga eiho inchen thei nadinga phat ihin peh u ahin nikhat Pakai ja dinga pehdoh hi hahsa isah lou ding ahi. Mi koitabang khat din ngolhoi tah danin kilang jong leh Pathen phatthei na chang achate senvang Nitheng ni pathen a dia peh doh ding it pouhitin chule houin kaina ding a ongman lou kahi ti hi eiho kamchengajong soda hen. Lungnachim taha Pathen hounan sundayu nikho hi neiingu hite.

Mission Column

KBC MISSIONARIES COUPLE RETREAT CUM SEMINAR 2017.

Achesa 5-7th September nichun KBC Missionary Manipur sunga umho jouse dingin 1st Missionary Couples Retreat cum Seminar 2017, Youth Hostel Khuman Lampak muna lolhing tah in anakibol tai. Rev Brian G. Fielhauer Director MTC Shilong leh Rev Helien Singsit Secretary East FMPB Resource persons in apang honin ahi. Hiche Retreat ahin Manipur aum missionary couples 46 ahung pang un ahi.

5th nilhah in Rev Henjalen Dounjel Mission Secretary in ahung kikhom missionary ho jouse, speaker teni le Board member ho jouse lemnale phon doh na aneijin chule pu Lhunthang Mate V/Chairman in hitabang Retreat kibol hiKBC Missionary ho anupa paova akihet to diudeina le kitil khoutona aneidiu deisah na chule lhagaova akisuhthou dinguh deisah na a kibol ahidan phon dohna anei jin ahi.

Nini sung kiman khomna a chun camper ho jouse alung lut thei lleh un ahi. Missionary khat hina a Pathen natoh ding dan le nupa kikal hinkho manding dan chule houbung mite to relationship semding dan athupi na kihil na resource person hoa konin akinei jin ahi.

Missionary ho jousen aheththei ding akidei sah jeh in Meilhei paova ledoh din Pastor KT Singh paolen akimang in ahi.

Pathen in itaonao asang in retreat sunga ana damlou boina toh koima cha um lou vin programme achelhan chule missionary ho jouse dia jong kitil khouna le thahat na lentah hiche programme hin apen Resource person teni chung a kipa thu akiseijin ahi.



Achainin Pu Jamkhothang Haokip Mission Chairman in kip-athu sein le kipa thil peh na anei jin mipi jousen taona akinei khom in phat jouse khum kha ahitai.

KBC MISSION SECRETARY CBCNEI MISSION MEETING A GAMPANG.



Pathen lungset in achesa 11th September ni chun Rev Alani MBC Mission Secretary toh Guwahatia CBCNEI Mission Board meeting a kagapang hon in ahi. Nilhah lam 2:30 velin Mission compound kaga lhung honin ahi. Nilhah in kakichol do honin ajing 11:00 am in Mission Board meeting chu katou pan uve. CBCNEI noi ja kikhai lha Convention 6 akonin delegates 10 kaga kikhom khom un ahi. Hiche meeting a chun 17th February nia Dephu Mission consultation Resolution ho velvetna akinei jin akitong doh leh akitong jing lai

ho kijah mat na akinei jin maban a CBCNEI noiija Association jousen Mission natosh khom, na a panlah khom jing ding dan tohgong akinei khom kitin ahi. Chule hiiche meeting achun OMF New Horizon te toh CBCNEI jin tohkhom na MOU Sign bol khom din kiphat sah na jong akinei jin ahi.

MBC SECRETARIES CONFERENCE 2017

GUWAHATI KHOPI A KBC JONG AGAKIPANG E



Achesa 15-17 September sung chun MBC Secretaries Conference Guwahati CBCNEI Mission Centre a agakimang in ahi. KBC thalheng in Rev Ngamjapao Haokip General Secretary, Rev Letpu kipgen Finance Secretary, Rev Henjalen Dounge Mission Secretary, Miss Lhingjanem Haokip Women Secretary chule driver Thomas agakikal song e. Conference speaker in Rev Paupu apang in chule Rev Dr Hawngam Haokip MBC President le Rev Dr Jolly Rimai CBCNEI Mission Secretary jong thusei mun khat cheh ahang hon in ahi. Delegates 115 alhing jouvin MBC Secretaries conference laha mitam na pen loi jin jong akisei je. Hiche conference hi CBCNEI, MBC chule Guwahati aum Manipur Baptist Christian ho jousepan lah khom na a kibol ahi. Guwahati a KWS ten jong kipah taha pan eina lah peh jehun achunguva kipa thu sangtah akiphong e.

KBC Worker's Retreat 2017

Lolhing tah a Kimang



Achesa September 5 – 8 chan chun Kuki Baptist Convention Worker's Retreat Elijah Gothol Mount mun'a ana kimangin ahi. Hiche Retreat nahin Rev. Ngamjapao Haokip General Secretary le Rev. Lamkeng Lhouvum Pastor KBC Gambih No. 7 Speaker hinan an ngol taokhomna ana kinei jin ahi. Hiche Retreat kimang hin KBC sunga Worker's jouse lhagao va kisuh hal nale kitao peh tohna phat nin akimangin ahi. Lolhing tah a Retreat akichai thei jallin Pathen thangvah na peo hitin, kumkit Retreat jong dam'a imu kit thei nadiuvin Pathen in eiching hoi jing taohen!

WOMEN COLUMN

Report le Kipa thuseina

Amasan KBC Thuso sim jouse Women Department thalhen-
gin ngailut na Salaam Pakai minin kahinpeuve.

1. Pathen lungset in tukum 2017 sungin jong Nute tohgon len-
pen Lydia Resource Centre jong amachal jingin, plot man jong
tukum pehchai dinga tohgon bangin akho akhoa Nute ho jouse
le Gambih sunga Nute Lamkai jousen pan nasatah nahin lah
jing jallun tukum a pehdinga 20 lakhs inagonu jong 13.50.000
(Thirteen lakhs & fifty thausand) only ipedoh thei taovin ahile
Nute ho jouse chungu kipa thu Pakai min in ahung kiphonge.

2 Lydia Resource Centre jong tukum in athah beh in Co-
Operative a Register akibol doh thei tan Pathen thangvah
aume.

3. Lydia Boarding jong Pathen lungset in tukum in Student
16 aumthei tan, tahsale lhagaova kipui hoina phatah in akibol
peh jingun, tuni chan geijin Chapangho Result jong ahoijing
thei in i-taona gao i-muthei jing tah jeh un Hatchung nung
Pathen thangvah aume.

4. Training bol ho jong amachal jing theijun tu chan geijin
Prescilla Partnership Centre ho lah a jong amachal loijin akip-
ang theijin Pathen phatna jal ahijeh in Amintheng thangvah
le vahchoijin umjing taken.

5. Tukum sunga Lydia hung vil ho:

Houbung mite le Gambih mite hon itaonao seh hilouvin tukum
sungin jong noiya minchong ho chenghin Lydia chapang ho
vilna ahung neijun, tilkhouna in thilpeh to thon taopeh na
ahung neijun achunguva kipathu Convention Nute thalhengin
ahung kiseije.

- a) Dt 15th Feb, 2017 nikhon KBC Gambih No 6 Nute hon Lydia vilna ahung neijun thilpeh jong Rs 1000/- ahinchoijun achunguva kipathu akiseije.
- b) Dt, 5th May, 2017 nikho hin KBC Gambih No. 13 Nute hon Lydia vilna ahung neijun, Anchang Bag 1 le Dal Kg 3 jong ahin pouvin achunguva kipathu akiseije.
- c) Dt, 20th Sept, 2017 nikho hin KBC C/C Singat Nute ho le Pastor pan vilna ahung neijun thilpeh jong Rs 500/- le Chini kg 2 jong ahinchoijun achunguva kipathu akiseije.
- d) Dt, 28th Sept, 2017 nikho hin KBC Gambih No. 2 Nute hole Pastorpan vilna ahung neijun thilpeh jong Rs 2000/- le anchang bag 1 ahinpouvin achunguva kipa thu ahung kiseije.
- e) Date 5.10.2017 Thursday nikho hin KBC Gambih No. 12 a um Khopijang Nute vilna ahung nei un chapang ho tilkhouna le taopehna anei utoh kilhon in anchang bag 2 le Alu bag khat ahin pouvin, achung uva kipa thu sangtah in akisei in



Pathen in phatthei boh taohen. Pathenin thilpeh hinchoija vil na hung nei jouse le tuni chan a taona le lamchom chom a panla ho jouse phat thei naboh cheh tao hen.

Pakai lhacha,
Lhingjanem Haokip
W/Secretary, KBC

BYPF OCTOBER TAONA BIDOI

1. Youth Assembly damma muthei nading.
2. Gambih jousea Youth lamkaiho damle bitna kumlhun thei nading.
3. Youth Day 2017 damma akimanthei jeh a kipathu sein.
4. KBC Youth khantou thei nading.
5. BQ 2017 lolhing tah a akichaithei jeh a kipathu sein.

Bible Quest Answer Paper

Pathen mapuina jallin BQ 2017 exam chu gamkai exam center jouse ah lolhing tah in akichaitan, hito lhon chun gambih sunga mopohna nei youth lamkai chengin jong BQ Answer paper cheng-chu office mun'a October lhasunga ithah lutsoh keidiuvin temna sangpen ikinei uve.

KBC YOUTH SECRETARY YOUTH DAY A AKIMANCHAHNA



Gambih 12 Youth Department tohgonna noiya Combine Youth Day manna Twilelon Baptist Church mun'ah ana um in hiche a chun KBC Youth Secretary jong Speaker in agapang in ahi. Thanop umna tah chu nisim khangthah mi 350 val in pan ana lauvin ahi. chuban

in Seminar topic chomchom in jong kihilna ana kinei jin ahi.

Seminar lampang a chun:

Theology : Pastor Satminlen Khongsai

Civil Service : Gl. James Dpoujapao Haokip

Medical : Dr. Tongjakai Haokip

Banking : Ng. Tingnu Kipgen

Entrepreneurship : Gl. Boilen Haokip

Nithum sung chun KBC Youth Secretary in jong Pathen thua lamhil na ana nei jingin, akikhom youth te ding in Pathen thu ana sei jingin ahi.

KBC YOUTH ASSEMBLY

**Amun: Centre Church, Chavangphai,
Gambih 15**

Anikho : December 6-7

**Apangding: KBC Houbung jousea youth
lamkai jouse thon louva
pangcheh ding.**

Youth Assembly Programme hi Nisim 15 October 2017 tengleh Gambih 15 a lamkaihotoh amun'a kisemding ahitai. Thonlouhel in pan lacheh ding in youth te ikitem cheh uve.

YOUTH KHUTTHEM

Kumseh leh Youth Assembly a ipohkhom jing u KHUTTHEM hi tukum jong Gambih jousea kon'a Youth Assembly tengleh ihin pohcheh nadiuvin hetsah ihuue. Gambih jousen thonlouvin, eiho makho ding le eiho ding gelnan thonlouhella KHUTTHEM hi ihin pohcheh diu hinte.

LITERATURE COLUMN

2017 PILHING LE SENIOR 2 SUNDAY SCHOOL EXAM

Pakaiya ja um le ngailut um Gambih Pastor, Gambih lamkai ho, Houbung lamkai ho, Sunday School Superintendent jouse le houbung mite jouse, Pakaiya jana le ngailutna chibai kahin peuve. 27th April, 2017 nikhoa CEC kilolna, "1941/CEC-KBC/2017: 10th December Sunday School Exam ding hi Men Department Assembly toh akito tah jeh in 26th November a Pre-pone boldin pha aki-satai," kiti dungjuia hi, KBC Calendar of Events a 10th December, 2017 Sunday School Exam nikhoa kikoi chu, 26th November, 2017 nikho joh hidingin akimavoh chon tai. Hijeh chun, houbung jousen Sunday School Exam adeh a Senior 2 le pilhing exam hi 26th Vovember 2017 masanga iboldoh uva, houbung sunga asangpen 3 (first, second, third) ho chu 26th November, 2017 nikho le Convention Level Exam a ihinsol cheh diu ahi.

Exam bolding dan hi phat/kum masa a anakibol banga Gambih Pastor le gambih lamkai ho vaisaina/mopohna le gontohna noiya gambih sunga houbung hoa kona asangpen 3 kilhengdoh ho chun lamkai ho gondung juia gambih sunga Centre khat a Convention Level Exam abol diu ahi.

Question Sample

Convention Level Exam thudoh hi anoiya banga hi hung kiseming ahi.

Pilhing

1. Muntiple choice (Thudoh donbutna A, B, C kipeho lah a adih pen lhen ding.
2. Thudoh ho hi thucheng lhomcha cha in donbutna pe in.
3. Thugol kipeho hi adih le 'Adih e' ti jih inalang, adih loule 'Adih-poi' ti jih in.
4. Thucheng akito/adih mangchan lang a-onglai khu jih dimin.
5. Anoiya kipeho ipi tina ham?
6. Anoiya kipeho hin ipi avetsah ham?
7. Anoiya kipeho hi koiyin koi jah a asei ham?
8. Akimuna lekhabu min le abung achang pe in.
9. Lungchin chang

Senior 2

1. Muntiple choice (Thudoh donbutna A, B, C kipeho lah a adih pen lhen ding.
2. Thudoh ho hi thucheng lhomcha cha in donbutna pe in.
3. Thugol kipeho hi adih le "Adih e' ti jih inalang, adih loule 'Adih-poi' tin jih in.
4. Thucheng akito/adih mangchan lang a-onglai khu jih dimin.
5. Kolkhum (Bracket) sunga thucheng kipeteni khu adihjo mangchan lang a-onglai jih dimin.
6. Anoiya kipeho hi ipi tina ham?
7. Anoiya kipeho hi koi sei ham?
8. Akimuna Bible (lekhabu) le abung achang pe in.
9. Lungchin chang/thulu

Note:

1. Nangma nangma houbung Exam a thudoh (Question) hi nangma houbungin nakisemdiu ham, gambih lamkai hon asemdiu ham tichu houbung lamkai ho le gambih lamkai ho nakinopto nau dungjui hiding ahi
2. Nangma namgma houbung Exam a thudoh (Question) jong chu chung a kipe Question Sample dungjui nasem diu ahi. Chuleh, houbung Level a ding hihen Convention Level a ding hijongle Exam a dinga kiginna nei jil-lai/simlai ho jong hitobang thudoh donbutna thei dinga kiging diu ahi.
3. Senior 2 simmun hi simmun lekhabu (Text) a Question kipeho jeng bou hilouva chung a kipe Question ho dungjui donbutna apah theina diuva simmun lekhabu (Text) phatah a asim chendeh uva kiging diu ahi.

SUNDAY SCHOOL DAY (LITERATURE) CHUNGCHANGA HETSAHNA LE TEMNA

Events Clalendar dungjui 12th Vovember, 2017 Sunday School Day nikho hi houbung jousen kitoh tah le kitup tah a imancheh theina diuvn Office langa kona Literature Department in Programme gongso hung kipe banga hi programme ina kisemtoh uva kitoh tah a inaman cheh diuvn hetsahna le temna ahung kineiye.

Thupi : Pathen Thua Kipuihoi (2 Timothy 3:16; Proverbs 22:6)

Speaker: Ama ama houbungin akiphatsahna dungjui agon pen pen chu Speaker a pang ding

Order of Service

Jingkah Kaikhom
 phat vop/phat homtoh :
 Mipi lasah khom :
 Phat lhanna tao :
 Lemna thusei :
 Labung :
 Phonnom phat ong :
 Key Note Address :
 Bible lunchin simphongna:
 Nei tokhom (Offering) : Alhandoh ding ...
 Labung :
 Thupi (Message) : Speaker
 Kilhadohna la :
 Kilhadohna tao :

Sun Kimanchana

Competition Items

1. Group, Group a Lungchin chang sei kitetna
2. Short Skit/Drama kitetna
3. La/Choreography kitetna
4. Bible Game

Nilhah Kaikhom

phat vop/phat homtoh :
 Mipi lasah khom :
 Phat lhanna tao :
 Labung :
 Phonnom phat ong :
 Suna competition Item ho Result phondohna le Prize hop-
 dohna:
 Bible lunchin simphongna:
 Labung :
 Thupi (Message) : Speaker
 Kilhadohna la :
 Kilhadohna tao :

Note

1. Houbung jousen gelkhohna neitah a Programme kigong dungjuia inaman tei cheh diuvin taona ahung kineiye.
2. Programme hi agongso bou hung kipe ahin, eima eima mun le hitheina dungjuia chelhahna theidinga a-onglai ho hi ina kisuh-toh uva hiche dungjuia chu ichal lhah diu ahi.
3. 'Key Note' Address kiti hi Sunday School Day kimanlona chung changa hetsahna thua aseitheidol khat in achomlana houlimna aneiding ahi.
4. Houbung phabep a Convention Literaterature & Publication Committee member ho le Office a Department Secretary ho Speaker hung diu ahi. Akisuh toh tingle, akisuh toh dungjuia houbung-ho hung kihetsah kitding ahi. Suhtoh theina dingin koitobang houbung ahungding Speaker ho lah a deichoma kikounom aum khah le aganna thei chanin Literature Secretary Pastor Haoneo Haokip toh kihet tona neiyute. Gambih Pastor kikounom aumle vang, Pastor pa toh nakihet todiu ahitai. Gambih Pastor ho jong hiche nikhoa hi igambih sunga houbung khat a kimangcha teiding kigou hite.
5. Anikho to kitoh a Literature Department a dinga nei tokhom (Collection/Offering) hi gelkhohna neitah a phatah a ihinboluva Office langa phatah a ihinthah cheh diuvin taona ahung kineiye.
6. Sunday School umlouna houbung neo phabep ho le Sunday school jillai mi tamlouna houbung phabep hon jong nahsah mona le geldaumna neilouva, Sunday School bol le bollou thu hilouva, Programme hung kigong banga chepi thei lou hon jong ihitheina dol cheh uva, houbung jousen hiche nikho hi gelkhohna neitah a thon louva inaman soh kei diuvin Pakai minin temna le taona ahung kineiye.
7. Sun kimanchahna kigong hi anikho moh man sanga Sunday School chapang ho Activities themkhat beg aum theina ding le thupitah a anikho mantheina dinga hung kigong ahin, ahithei chana ahung kigong banga inaman cheh diuvin taona ahung kineiye.

Pakaiya natohkhompiu

Pr. Haoneo Haokip
Secretary, Literature & Publication

9th

ASIA PACIFIC BAPTIST CONGRESS 2017 (Yogyakarta Indonesia)

Kum nga dana hungkibol jing Asia Pacific Region a dia Baptist te kiloikhomna lenpen 9th Asia Pacific Baptist Congress chu achesa 25-28th September 2017 sung chun Yogyakarta Indonesia khopia lolhing tah in anakilom tan ahi. Hiche khompia dinghin Manipur Baptist Convention noija mi 24 anakiche doh in kipa um tah khat chu hicheng laha hin KBC mi 8 agakipang in ahi. KBC Office akon pan gala se chu Rev Ngamjapao Haokip General Secretary, Rev Henjalen DOUNGEL Mission Secretary, Rev Kaikhokam Chongloi Men Dept Secy, chule Pastor Haoneo Haokip Literature Secretary ahi-ue, chule ama changval a hung pang ho chu Rev Dr Hawlngam Haokip President KBC, Rev Demkhoneh DOUNGEL, Nu Tinkhohoi DOUNGEL (w/o Rev D.DOUNGEL) chule Gl Lena Haokip ahiue.

23rd September nin Imphal Tuliher Airport akon kana kipat doh un direct Indonesian Flight um lou jehin via Singapore in kana cheovin 24th Sept. 2:30 pm in Yogyakarta kagalhung un ahi. Ajing 25 ni nilhah in Convention Hall a Yogya State Governor pun 9th APBC hondoh na anei jin "NEVER ENDING GOOD NEWS" ti thupi mangchan kaikhomna programme masapen anakipan tan ahi.

Lhunna mun:-

Hiche Congress a hungkhom ho din Local Arrangement Committee (LOC) in Sahid Jaya Hotels & Convention Yogyakarta hi booked ana bollun ahi. Hiche hotel hi 4 starred Hotel ahin anneh tuidon lhuna gena akitup in anom lheh jenge. Room service ahoijin chule Congress steward ho tilou asunga natong ho jong eiho limle mel pu ahijeh un kinai nale kingamsumna lungthim akineijin lungthim kilhap aumlheh jenge.

APBF IPI HAM?

Hiche hi Asia Pacific Baptist Federation tina ahin atilla chu Asia Baptist Federation tia ana kihe ahi. 1975 kuma chu Baptist World Alliance Regional Fellowship khat a anaum ahi. Hiche hin Asia Pacific gamsunga Baptist kiloikhom naho akipun khom sah a asuh hat ahi.

Purpose:-

1. Baptist ho laha kipum khat na le kitho khomna semhoi na ding
2. Baptist World Alliance a Region khat a natoh nading
3. Pate, Nute chule Chate natohna kipumkhatna semdohna ding
4. Evangelism natoh suh hatnading
5. Asia Pacific gamsunga khantou machal natoh hole genthei kithopina natoh gonpeh thei nading
6. Gamkhat le gamkhat kala missionary natoh na machal nading, kithokhom na natoh munding
7. Christian sakho hi adang dang hotoh kihoutoh a Pathen natoh nalampi semhoiding.

History:-

Asia Baptist Federation hi Baptist lamkai tamtah in Asia Pacific Region a Mission Vision ananei u suh bulhit nadinga 12th Baptist World Alliance Congress 1970 kuma Tokyo muna lunggon ananei pan u ahi. Hiche a kona chu akilolnao alung gelu chu BWA Congress a ahin poh dohuva phalpeh na anathum u ahi. Congress chun hiche proposal chu phalpeh na ananei uva, Provisional committee analhen doh uva Regional Federation khat semdoh nading anagon u ahi. Hiche committee chun Astralia akon Alan Prior chu Asia gam Baptist Christian te to kimuto dinga nganse na anei uva, aman jong agavil le chuche lai gamtam tah in Independent amuthah u ahitoh Ihona Baptist Federation khat a um a Baptist te kihetto a Pathen na tohkhom nom na anei nao agamudoh ahi.

Hiphat achu aman BWA Congress 1975 Stockholm muna athil mudoh chu present ahin bola Dec 1 nia kihou ahin pat uva ahung kikhom lamkai ho phasah jala Asian Baptist Federation hi phudoh ding pha ahin sahu ahin, Associate Secretary masapen dia Alan C. Prior ahin Ihengdoh uva chule Dr. W.G. Wickramasinghe of Sri Lanka chu President masapen a anal hen dohu ahi. Hitia chu Asia Baptist Federatiuon chu anaphu doh uva ahung machal chal le tunia hiche Federation hi Pacific Region hopa akehlen kit uva member country hi 26 aphah a Baptist World Alliance a kikhai kikhop na lenpen khat chu hung hi ahitai.

Yogyakarta a Kimanchah dan:-

Nilhah masa nin gamchom chom a kon hung kikhom delegates ho dindoh sana le misimna Pu Bijoy A.Sangma Chairman APBF Communication in ahin bolin gam 26 akon delegates 860 lam ahung kiokhom doh in agam mi houin kaija hung hotoh simthan mi 1100 tabang aki kikhom doh e. Pathen thua houlimna Rev Ross Clifford President APBF in aneijin ahi. Hiche nilhah a Philippines gama kon Himamaylan Baptist Church Choir ho lasah chu mijouse lungna chimna pen lakisa anahikhan ahi.Chule congress sunga mijouse mitlapen choir chu "Hossanna" Orchaestra South Korea a kon Children Choir ho chu ahipenne.

Nilhah jingkah a mipi Pathen houkhom na aumjing in kikhop khom na sungin 7 vei houin kaina aume. sunle topic chom chom a kon in WORKSHOP akinei jin, vannoiija thusei minthang tah tah Baptist preacher hole leader hon class alajiu vin ahi. Workshop hi class 11 in akihom khenin sunvai lang le khat vei nilhah lang le khat vei aki-bol jin,eima deina topic pen pena chu gakipang ji ahi.Resource persons hohi hetthei tah, miman tam tah cheh ahiuvn vangphat aumlheh jeng e. Nilhah lam le hutthum in Rallies aumjin Youth Men, chule women Rellies ahiji. Nithum sunga workshop kibol a kihilna kinei ho topic hohi aphachom lheh jengin kipa aumlheh jenge.

Hiche APBF hi kumnga dana kivaihom na kistem ji ahito Ihonin ma-ban a leader thah lhen na APBF General Council meeting 27th Sept. nichun toukhomna anaum in ahi. President dingin Rev Edwin Lam Singapore Baptist Convention lhendoh ahin, General Secretary dingin Rev Dr Vesekhoyi Tetseo(vee) Okinawa Baptist Convention Japan lhen doh ahi, chuleh vice president dingin Mr Bijoy Sangma GBC India, Mr Raty Inoke, Fiji chule Mr. Mark Wilson Australia lhen doh ahitaove. Amaho lamkai na a hi 2022 le South Korea a APBF Congress um kit ding ahitai.

City Tour:-

27 ni nilhah lam in Khopi sung vetna ding phat ong akihongin 9th century lama ana kisa Indonesia ding keo hilou va vannoileiset na Hindu Temple laha thupi pen le hoipen tuni chana semphat um-louva original a anakisah bang banga umjing nalai Hindu temple vet na jong agakinei jin ahi. Hiche a chelou mi phabep vang Piazza Ambarrukh kiti city Maul a bazaar kai ja chejong aumda poi.

Pakai Anthengjon:-

Tahsan khat kivi homna khat hina photchet nan 28 ni jingkah Pa-

then houkhom na a Rev Ross Clifford outgoing President pu lamkai nan Indonesian pastor ho sese lhachan apangun Pakai Antheng jonkhom na akinei jin ahi. Denomination kibah lou jallin Pastor ho Antheng hop dan jong akibang jipoi, hijongleh tuchung Antheng kihop dan chu eiho KBC in iche pi bang bangun changlhah akisingin taona akimangin chu in thakhat tahin akinen chujouvin lengpitui akilan taona akimang in thakhat tahin akidon khom kit in ahi. Hiche hin Baptist te chena lhongpi kibah na avetsah in kipa lungmon aumlheh e. Chujouvin President Edwin Lam in phat jouse khumkha ahitai tia phondoh nale taona amangin phat chai ahitai.

Kipa thuseina:-

Hitabang Baptist te kikhopna mantam penna pan lading a phal-pehna eihin neiu CEC chung a kipa thu kahin sei jin chule hiche programme lolhin nadingle akalsongho damsella hung kile kit thei nadinga taona a hingeldoh jing houbung mite chung a kipa thu sangtah in kahin phonge. Pathen in KBC phatthei bohjing henlang hitabang kikhopna len hoa lamkai lentah tahhin tuh ding khang-dong ching le them thahat eihin petei taohen.

Pakaija natoh khompiu
Rev Henjalen Doungel
Secretary,
Mission & Evangelism KBC

Baptist Church Haijang munah “Ngailut Pate camp”

Date 7-10 September sangin Baptist Church Haijang munah “Ngailut Pate camp” Haosapu Pu Alun Haolai jin akho upa ho gelkhoh na jallin sponsored abol lin, Camp speaker lin Pr. Elvis Nehlal leh camp Director lin Evan Lalboi Kippen apang lhonin chuleh camp lhandoh naleh khumkha na Pr. S. Vaiphei gambih Pastor pan aneijin. Camp kibol sungin nuten angol-lin taona aneijun lolhing tahin camp anakichai jin, camper upa 53 alhingin atamjon Christa kipana thupha akisanu toh lhonin, neh phalou jule sa haisan din kipeh lhah na aneitaovin ahi. Haosa pun hitobang akhomi te lhagao pohnat na aneija a sum apai it louhella ahinpoh doh jeh in kipa thu iphong guve. Kakipah e natoh khompie Pr. S. Vaiphei Pastor, KBC 10.

CHATE CAMP REPORT

MOLSANG BAPTIST CHURCH, KBC No18

KARBI-ANGLONG (ASSAM)

Pathen lungsetna jallin achesa nisim 20th to 24th July, 2017 nikho sung chun Molsang Baptist Church, Assam mun'a lol-hingtah in CHATE CAMP ana kimangn ahi. Camper 86 ahin, Speaker: Evan. Thangboi Kipgen leh Pastor Jamminlun KBC No.18 Pastor amani jong Pathenin amanchah Ihon jallin, hinkho kikhella, kipana nei mi phabep aum un ahi. Convention Nute lamkai ho chule KBC No.18 (Houbung) tinna, Sum le pai, neile gou, tha le lungthim'a pan hin laho jouse chungu kipathu ka-hin sei uvin, chule I-pau Pathenin phatthei naboh jing tauhen.

Christa jalla na sopiu,

Hoinu Chongloi,
Chairperson,
Women Department, KBC.18.

Lily Kipgen
Secretary,

KBC MISSION NA TOH NA A ITAOKOP DIUVA DEISAH

TAOKPO U HITE

1.Th.Thoibi amahi tu naicha a chu Hindu akan Jesu Christa akisan in taokop ute. _Khupthang.

2.Bishnu Tamang Christa akisan thah ahi in ,taokop ute _Kamal Tamang.

3.Atahsan thah Miss Phool Maya.taokop ute. _Jeeten Gazmer.

4.Manipur Nepali Mission field leh Manipur Meitei field a Missionary ho din taopih ute.Pathen na ahinabong a atoh theina diovin- _M/E Secy,KBC.

Sunday School Union

Sangaikot, Gambih No. 11



Achesa nissim 23, September 2017 jinglam nidan 9:30am vellin KBC Centre Church Sangaikot , Gambih No.11 munna Sunday School Union in Kumkhat sunga dinga Sunday school chapang ho tahsa lamle lhagao lam'a kisuh halna dinga Sunday School sports ana kimang in ahi. Hiche gingon ahin Pastor Tingoulen Haokip, Pastor C/C Sangaikot kin Thempun aspangin chuleh Guest adingin Mr. Letkholal Haokip, Gl. Seikhohao, Gl. Thangminlal chule NI.Neneimi hicheng hi chapang ho ngailut jallin asna pangun ahi.

Pathen lungsetna jallin hitobang kumkhat Ihinna a asna kimang Sunday school sport hi damsella lolhing tahin ana kichai tai. Pathenin malam'a hitobang thilgon aumkit theiya lolhin'a akimu theina dingin houbung miten taonan nei hin geldoh jingun kaki pah e.

KBC No. 16

Youth Camp Cum Combine Youth Day



September 28-30 sung'in, Molnom Houbung a, Gambih Youth Camp a kibol'in,

Speaker:

Evan. Letminthang Haokip, Camp Director: Pr. Mangjapao Haokip (Gambih Pastor),

Thupi;

"Thina mun a, kon in zam in" (Gen.19:17) chule,

Camper:

208 (Gollhang 110 & Nungah 98)a pang'in ahi.

Combine Youth Day

October 1 ni'in, Gambih Combine Youth Day, a kimang khom'in (a kikhom doh jat 378), Competition in a kimang in (Competition item ho; 2017 Youth Day Lapi, Debate, Ex-tempore speech, Duet, Trio & Storytelling), a kinei'in, chuleh Gambih Pastor pan, tilkhouna thu ase'i'in ahi. Nilhah Kaikhom kikhan'in, Camper ho Za Lenkhomna, a kinei'in ahi.

PARTICIPATE & PRAY



KUKI BAPTIST CONVENTION GAMBIH No. 7
YOUTH GOSPEL OLYMPIC
JOUJANGTEH BAPTIST CHURCH **2017**

Theme:

*"Christ's
Ambassador"*

II Cor. 5:20

PRAISE &
WORSHIP

The 2nd Youth Gospel Olympic 2017
16th-21st OCTOBER 2017

KUKI BAPTIST CONVENTION PARISH No. 7
JOUJANGTEH B/C, KBC No.7

EVENTS

YOUTH ICON
TALENT SHOW
TUG-OF-WAR
MEN'S FOOTBALL
GROUP SONG COMPETITION
MEN & WOMEN'S VOLLEYBALL
ATHLETICS
ETC.

*Youth
Icon*



SPEAKERS



Rev. Lamkeng Lhouvum
Pastor, KBC No. 7



Pastor Satminlen Khongsai
Youth Secretary, KBC

Post Regd. MNP/81
Regd No. 18134/88



If undelivered, please return to
The Editor. KBC Thuso
KUKI BAPTIST CONVENTION
Opp. DM College, Imphal - 795 001
Contact: 9862633173